

Headlines

1. मुखमंत्री उमर अब्दुल्ला होरें हाड़ें दे बाद पुनर्वास सरबन्धी कम्में दी समीक्षा कीती ते अधिकारियें गी नुकसान दा फौरी तौरा पर जायजा लैने दे निर्देश दित्ते।
2. जम्मू-कश्मीर पुलसै दी अपराध शाखा नै जम्मू च नमें आपराधिक कनूनें बारै त्र'ऊं दिनें दी बड्डी प्रदर्शनी दा आयोजन कीता।
3. जम्मू-कश्मीर दे राश्ट्री सेहत मिशन नै अपने सारे अनुबंधित मलाजमें दी तनखाह च 5 फीसदी बाद्दा करने दा हुक्म जारी कीता ऐ।
4. कठुआ जिले दे मल्हार इलाके च बड्डे पैमाने पर आतंकवाद रोधी अभियान शुरू कीता गेआ ऐ।
5. नरातें दे पैहले ध्याड़े अज्ज 10 ज्हार कोला मते श्रद्धालुएं श्री माता वैश्वो देवी जी दी पवित्तर गुफा च मत्था टेकेआ।

<><><><><><>

CM-Flood

मुखमंत्री उमर अब्दुल्ला होरें इक उच्च सतह दी बैठक दरान हाड़ें मगरा दी स्थिति, पुर्नबहाली ते राहत ते बचाव कम्में दा जायजा लैता। बैठक दरान मुखमंत्री होरें सरकारी मैहकमें गी हिदायत कीती जे ओहू नुकसान दा जायजा लैन ते राहत सहायता फौरी तौर पर प्रभावितें गी तस्कीम करन। उनें जोर देइऐ आखेआ जे हाड़ें करी प्रभावत इलाकें च रौहने आहले लोकें गी दरपेश मुश्कलें दा प्रशासन आसेआ फौरी तौरा पर हल कीता जाना लोड़चदा। मुखमंत्री होरें आखेआ जे प्रदेश च ज्यादातर इलाकें च राबता बहाल होई गेआ ऐ। उनें अफसरें गी हिदायत कीती जे बाकी रौहंदी शिड़कें गी परतिए खोलने लेई तेजिया कन्नै कम्म कीता जा तां जे पूरी चाल्ली राबता बहाल होई सकै।

<><><><><><>

Exhibition Criminal Laws

गृह मंत्रालय दे निर्देशें दी पालमा करदे होई क्राइम ब्रांच जम्मू दी आर्थिक अपराध शाखा नै अज्जै थमां गुलशन ग्राउंड च नमें आपराधिक कनूनें बारै त्र'ऊं दिनें दी इक बड्डी प्रदर्शनी दा आयोजन कीता ऐ। इस बारै जानकारी दिंदे होई इस प्रदर्शनी लेई नोडल अफसर नियुक्त कीते गेदे एसएसपी बेनाम तोश होरें दस्सेआ जे डीजीपी नलिन प्रभात ते आईजीपी क्राइम सुजीत कुमार सिंह हुंदी दिक्ख-रिक्ख च जम्मू च पैहली बारी बड्हे पैमाने पर इस प्रदर्शनी दा आयोजन कीता जा'रदा ऐ।



NHM

राश्ट्री सेहत मिशन नै अपने सारे अनुबंधित कर्मचारिएं दी तनखाह च 5 फीसद दा बाद्दा करने दा हुक्म जारी कीता ऐ। आकाशवाणी जम्मू संवाददाता दी रिपोर्ट मूजब इस सरबंध्यै च एनएचएम जेएण्डके दे मिशन डरैक्टर हुं'दे आसेआ आदेश जारी कीता गेआ। एहू आदेश सारे कर्मचारिएं पर लागू होग, भाएं ओहू प्रदेश, डिविजनल, जिला जा ब्लॉक सतहें पर कम्म करा'रदे न। सेहत ते परौआर कल्याण मंत्रालय आसेआ मंजूर कीता गेदा ऐ ते इसी प्रदेश सेहत सोसायटी दी बी मंजूरी हासिल ऐ।



Sewa Parv Smart City

मुख्य भरै च मनाई जा'रदी "सेवा पर्व" पैहलकदमी तैहत अज्ज अस तुंदे आस्तै लेइये आए आं जे किस चाल्ली प्रधानमंत्री नरेंद्र मोदी हुंदी अगुवाई आहली सरकार नै स्मार्ट सिटी मिशन राहें शैहरी इलाकें गी बदला'रदी ऐ ते लोकें दे जीवन च बेहतरी आहना'रदी ऐ। स्मार्ट सिटी मिशन भारत दे शैहरी इलाकें गी नमें सिरेआ आकार देआ'रदा ऐ, आसें-मेदें गी हकीकत च तब्दील करा'रदा ऐ। प्रधानमंत्री हुंदे आसेआ जून 2015 च शुरू कीती गेदी इस पैहलकदमी दा मकसद शैहरें च टिकाउ हल दे राहें जीवन जीने दे म्यार च सुधार आहना ऐ। पिछले इक दाहके च इस मिशन नै महत्वपूर्ण प्रगति हासल कीती ऐ। 8 ज्हार कोला मती परियोजनाएं चा तकरीबन 94 फीसदी परियोजनाएं दा कम्म हून पूरा होई गेदा ऐ।

NGO-Rehabilitation

गैर सरकारी संगठन निर्मला गुंजन फाउंडेशन नै भारती सेना दी मदद कन्नै राजौरी ते पुंछ च प्रभावित 117 परौआरें च 42 लक्ख रपे बंडु। एह सहायता आपरेशन सिंदूर दरान बन्ने पारा आसेआ कीती गेदी गोलाबारी करी प्रभावित परौआरें गी दित्ते गए न। मन्ने-परमन्ने दे कलाकार ते समाजसेवी नाना पाटेकर हुंदी अगुवाई च एनजीओ दे होर दुए मिम्बरें रजौरी दा दौरा कीता। राजौरी दे डिप्टी कमिशनर अभिषेक शर्मा ते सेना दी 25 डिविजन राजौरी दे जीओसी मेजर जनरल कौशिक मुखर्जी होर बी मौजूद हे।

<><><><><><>

Anti-Terror Op

कठुआ जिले दे मल्हाड इलाके च सुरक्षाबलें आसेआ आतंकवाद रोधी अभियान चलाया गेआ। एह तपाशी अभियान इलाके दे द्रागल ग्रांऽ च 2 संदिग्ध दिक्खे जाने मगरा चलाया गेआ। आकाशवाणी जम्मू संवाददाता दी रिपोर्ट मूजब 2 थेआरबंद आतंकवादिएं दी मौजूदगी दी टकोदी सूह थ्होने परैंत एह अभियान चलाया गेआ। इस अभियान दा मकसद आतंकवादिएं गी फगड़ना ते कुसै बी माड़ी घटना गी रोकना ऐ। जम्मू-कश्मीर पुलस, सेना ते सी.आर.पी.एफ आसेआ सांझे तौरा पर अभियान चलाया गेआ ऐ तां जे संदिग्ध आतंकवादिएं गी फगड़ेआ जाई सकै।

<><><><><><>

SMVD-Navratri

9 दिनें तगर चलने आहले नरातें दे पैहले ध्याड़े त्रिकुटा पहाड़ियें पर स्थित श्री माता वैश्वो देवी जी हुंदी पवित्तर गुफा च अज्ज 10 ज्हार कोला मते श्रद्धालुएं मत्था टेकेआ। श्राइन बोर्ड ते मकामी प्रशासन नै श्रद्धालुएं आस्तै बवस्थित ते बेहतर अनुभव यकीनी बनाने लेई व्यापक तैयारियां कीती दियां न। तीर्थ यात्रियें, खासतौरा पर महिलां, बच्चे ते बुजुर्गे दी मदाद आस्तै जात्तरा आहले रस्ते च महत्वपूर्ण थाहरें पर बशेश हेल्प डेस्क लाए गेदे न ते स्वयंसेविएं गी तैनात कीता गेदा ऐ। इंतजामें बारै संदोख बुज्जदे होई श्रद्धालुएं गलाया जे नरातें दरान माता रानी दे दर्शन करने लेई उन्दे लेई खास आध्यात्मिक अनुभव ऐ।

<><><><><><>

Campaign

जम्मू-कश्मीर च हाडें ते ल्हास-पस्सिएं करी प्रभावित इलाकें च पानी दी गुणवत्ता दी जांच ते पानी करी पैदा होई सकने आहली बमारिएं थमां रोकथाम सरबंधी 15 दिन दा व्यापक अभियान सम्पन्न होई गेआ ऐ। एहू अभियान 4 सितंबर गी शुरू कीता गेआ हा तां जे हाडें मगरा पानी करी पैदा होई सकने आहली बमारिएं थमां बचा होई सकै। एहू अभियान जल शक्ति मैहकमा, जल जीवन मिशन दी इक भेठा बचनबद्धता गी दर्शांदा ऐं मैहकमे आसेआ प्रभावितें गी साफ स्वच्छ पानी पजाने दी हर संभव कोशिश कीती गई। पीएचई डिविजन दे अमले आसेआ पानी दी गुणवत्ता दी जांच कीती गई।



GST-Reforms

वस्तु ते सेवा कर दियां नमियां दरां अज्जै थमां लागू होई गेइयां ना। एहूदे तैहत 12 ते 28 फीसद दे कर दी स्लैब गी हटाई दित्ता गेआ ते एहूदी थाहर हुन 5 ते 18 फीसद दी स्लैब होग। Luxury ते किश होर उत्पादें गी छोडियै सारियां चीजां ते सेवा इनें दौनें स्लैबें च आई गेइयां ना। नमीं दरें दे लागू होने दे कन्नै लोक हुन घट्ट कीमतें पर अपनी पसिंद दी चीजां खरीदी सकडन ते देश आत्मनिर्भर भारत की दिशा च अगगे बदोग। जम्मू खित्ते च इसी लेइयै खासा उत्साह दिक्खेआ जा'रदा ऐ, सब्बै वर्गे दे लोके नमें कर सुधारें दी सराहना करदे होई आखेआ जे सरकार दा एहू कदम उन्दे जीवन च बड्डा बदलाव लेआग की जे एहूदे नै रोजमर्रा दी जिंदगी च इस्तेमाल होने आह्लियां चीजां सस्तियां होडन।



Prog. Announcement

आकाशवाणी जम्मू दा क्षेत्रीय समाचार एकांश अगली पीढी दे जी.एस.टी. सुधारें मतल्लक विशे पर 15एं मिनटें दी इक बशेश परिचर्चा प्रसारित करा'रदा ऐ। एहू परिचर्चा जंदी 19 सितम्बर गी प्रसारत कीते गेदे बशेश कार्यक्रम दा दुआ भाग ऐ ते एहू जी.एस.टी दी 18 फीसद ते 40 फीसद आहली स्लैब दे अमल च औने सने 28 फीसद जीएसटी स्लैब गी खत्म करी देने उप्पर आधारित होग। कल मंगलवारें 23 सितंबर गी बड्डुलै 8 बज्जियै 45एं मिनटें पर इस प्रोग्राम दा विशेश प्रसारण होग। इस कार्यक्रमै च साढी परौहिनयां होडन जम्मू-कश्मीर सरकार दे स्टेट टैक्स विभाग दिआं एडीशनल कमिशनर ते जम्मू-कश्मीर प्रशासनिक सेवा दिआं वरिष्ठ

अधिकारी श्रीमति नमरिता डोगरा, जेडियां इस विशे पर अपने माहिराना बचार सांझे करडन। इंदे कन्नै गल्लबात मेरे यानि विजय बजाज आसेआ कीती जाहग। सुनदे रवो आकाशवाणी समाचार जम्मू मीडियम वेब 303 मीटर 990 किलोहर्टज पर ते एफ.एम 100.3 मेगाहर्टज पर।

<><><><><><>

Seva Parv Doda

सेवा पर्व पैहलकदमी दे इक हिस्से दे तौरा पर आई.टी.आई डोडा च इक बशेश कार्यक्रम दा आयोजन कीता गेआ जेदे च विद्यार्थियें ते मकामी बसनीकें बदी-चडिये हिस्सा लैता। कार्यक्रम दरान संस्थान दे माहिरें, दाखला प्रक्रियाएं, उपलब्ध कोर्सें ते कोशल विकास दे महत्व बारै व्यापक जानकारी सांझी कीती। उनें गलाया जे इस चाल्ली दे हुनर आधारत कोर्सें च दाखला लेइयै नौजवान ना छडा अपने हुनर च सुधार करी सकदे न, सगुआं भविक्ख च बी नौकरी दियां बेहतर संभावनां हासल करी सकदे ना।

<><><><><><>